

草木典第二百二十卷

李部彙考

釋名

李 詩經

休 爾雅

座 爾雅

駸 爾雅

接慮 爾雅

嘉慶子 西京記

居陵迦 梵書

李岡



詩經 召南何彼穠矣

何彼穠矣華如桃李平王之孫齊侯之子

箋華如桃李者興王姬與齊侯之子顏色俱盛疏以王

姬顏色如齊侯之子顏色故舉二木也

朱注李木名華白實可食

禮記 內則

瓜桃李梅

注皆人君燕食所加庶羞也

玉藻

食棗桃李弗致于核

注恭也疏謂懷核不置于地也

爾雅 釋木

休無實李

注一名趙李

座接慮李

注今之麥李

駁赤李

注子赤疏

別李屬也李之無實者名休郭云一名趙李座接慮李郭云今之麥李與麥同

熟因名云李之子赤者名駁

桃李醜核

註

子中有核人疏桃李之屬皆子中有核人曲禮云其有核者懷其核

棗李曰寔之

註

啖食治擇之名

疏

治棗李皆去其寔寔者核也

春秋緯 運斗樞

玉衡星散爲李

山海經 北山經

邊春之山多桃李

東山經

岐山其木多桃李

孟子之山其木多桃李

中山經

靈山其木多桃李梅杏

卑山其上多桃李

賈思勰齊民要術 種李

爾雅曰休無實李座接慮李駁赤李廣志曰赤李麥李細小有溝道有黃建李青皮李馬肝李赤

陵李有離李肥黏似饊有柰李離核李似柰有劈裂有經李一名老李其樹數年卽枯有杏李味小酸似杏有黃扁李有夏李冬李十一月熟有春季李冬花春熟荊州土地記曰房陵南郡有名李風土記曰南郡細李細而先熟西晉傳元賦曰河沂黃建房陵縹青西京雜記曰有朱李黃李紫李綠李青李綺李青房草下李顏回李出魯合校李羌李燕李今世有木李實絕大而美又有中植李在麥穀前而熟者李欲栽李性堅實脫五歲者始子是以藉栽枝者三歲便結子也

李性耐久樹得三十年老雖枝枯子亦不細嫁李法正月一日或十五日以磚著李樹岐中令實繁又法臘月中以杖微打岐間正月晦日復打之亦足子也 又法以煮醴酪火微著樹枝間亦良

樹寒實多者故多束之以取火焉

李樹桃樹下並欲鋤去草穢而不用耕墾 耕則肥而無衍

實樹下犁撥卽死之

桃李大率方兩步一根

大概連陰則子細而味亦不佳管子曰五沃之土其木宜梅李韓詩外傳

云簡子曰春樹桃李夏得陰其下秋得食其實春種蒺藜夏不得採其實秋得刺焉家政法曰二

月從梅李也

作白李法用夏李色黃便摘取于鹽中揆之鹽入汁出然後合鹽曬令萎手捻之令匾復曬更捻極匾乃止曝乾飲酒時以湯洗之漉著蜜中可酒矣

郭臺馳種樹書 李

桃樹接李枝則紅而甘

李樹接桃枝則爲桃李

桃李銀杏栽帶子向上者個個生向下者

少 桃李蛀者以煮豬頭汁冷澆之卽不蛀

陸佃埤雅 李

素問曰李韭皆酸李東方之果木子也故其字从木从子性頗難老老雖枝枯子亦不細其品處桃上故果屬有六桃最爲下孔子飯黍不以雪桃而詩曰投我以桃報之以李又曰丘中有麻彼留子嗟丘中有麥彼留子國丘中有李彼留之子言麻以衣之麥以食之又有李焉且皆丘中植之則留子之政修矣此人之所以思之法言曰男子畝婦人桑之謂思呂子曰子產相鄭桃李之垂於術者莫之援也然則丘中有李又能使人不盜也爾雅曰桃曰膽之棗李曰鼈之蓋棗李之臍去鼈而已舊云桃李種法大率欲方兩步一根密則陰輒相扇不惟子細味亦不佳也論語曰朋友數斯疏矣

有是哉化書曰李接桃而本强者其實毛梅接杏而本强者其實甘此明造化之權有以知巧而移莊子曰接子之或使此之謂也爾雅曰休無實李言可休息而已無實也

羅願爾雅翼 李

李木之多子者故從子亦南方之果也火者木之子故名若古文則木傍子爲籽其花與桃尤繁密故詩云何彼穠矣華如桃李蓋有女同車之詩比之舜華舜英舜並蒂之華彼以諸侯娶諸侯之女故華色相稱也何彼穠矣之詩比唐棣之華以言其反而後合若下降然故比于桃李之華則車服不同而皆華盛也春秋運斗樞曰玉衡星散爲李爾雅李有三種座接慮李卽今之麥李與麥同熟者爲果肉厚而乾與核相離駁亦李則李之赤而有實者休無實李李實繁則有竊食之嫌雖欲正冠其下且不可猶漢廣之喬木不可休息無實則其下可休矣行人謂之行李亦或取于此潘岳賦曰房陵朱仲之李山海經邊春之山多李古者司商協名姓商五聲之清者司商掌賜族受姓之官人始生吹律合之定其姓名至老子生于李下乃指以爲姓不假吹律漢京房本姓李乃吹律改姓京氏不可曉今人論五姓但以張爲商李爲徵古法不復見矣管子謂黃帝使后土爲李冬者李也

越絕書言勾踐諸侯從之若果中之李

格物總論 李

李實數種或朱或黃或綠或紫或斑點大者如杯小者如雞卵核小味甘脆皆果中之珍也

王世懋果疏 李

李種亦殊多北土盤山麝香紅妙甚江南絕無然亦有一種絕大而紅者味可亞之亦有玉黃青翠嘉慶子俱稱佳品吾園中僅有粉李一種餘當致之

徐光啟農政全書 李子樹救饑

取摘李實色熟者食之不可臨水上食亦不可和蜜食損五臟及與雀肉同食和漿水食令人霍亂
澀氣多食令人虛熱

本草綱目 李釋名

李時珍曰按羅願爾雅翼云李乃木之多子者故字從木子竊謂木之多子者多矣何獨李稱木子耶按素問言李味酸屬肝東方之果也則李於五果屬木故得專稱耳今人呼乾李爲嘉慶子按草

述兩京記云東都嘉慶坊有美李人稱爲嘉慶子久之稱謂既熟不復知其所自矣梵書名李曰居陵迦

集解

陶弘景曰李類甚多京口有麥李麥秀時熟小而肥甜核不入藥姑熟有南居李解核如杏子形者入藥爲佳 馬志曰李有綠李黃李紫李牛李水李並甘美堪食核不中用有野李味苦核仁入

藥 蘇頌曰李處處有之郭璞註爾雅休乃無實李也一名趙李座音磋乃接慮李也一名麥李細熟有溝道與麥同熟駁乃赤李也陶氏所謂南居李今不復識醫家但用核若杏核者 寇宗

奭曰李樹大者高丈許一種御李子大如櫻桃紅黃色先諸李熟醫家用者亦少 李時珍曰李

綠葉白花樹能耐久其種近百其子大者如杯如卵小者如彈如櫻其味有甘酸苦澇四種其色有青綠紫朱黃赤縹綺臙脂青皮紫灰之殊其形有牛心馬肝柰李杏李水李離核合核無核匾縫之異其產有武陵房陵諸李早則麥李御李四月熟遲則晚李冬李十月十一月熟又有季春李冬花春實也按王禎農書云北方一種御黃李形大而肉厚核小甘香而美江南建寧一種均亭李紫而

肥大味甘如蜜有壁李熟則自裂有糕李肥粘如糕皆李之嘉美者也今人用鹽曝糖藏蜜煎爲果惟曝乾白李有益其法夏李色黃時摘之以鹽按去汁合鹽曬萎去核復曬乾薦酒作釐皆佳

實氣味

苦酸微溫無毒

李時珍曰李味甘酸其苦澇者不可食不沉水者有毒不可食

大明曰多

食令人臃脹發虛熱

孟詵曰臨水食之令發痰瘡不可合雀肉食合蜜食損五臟

寇宗奭

曰不可合漿水食發霍亂澀氣服朮人尤宜忌之

實主治

別錄曰曝食去病熱調中

孟詵曰去骨節間勞熱

孫思邈曰肝病宜食之

核仁氣味

苦平無毒

核仁主治

別錄曰僵仆踈折瘀血骨痛

吳普曰令人好顏色

甄權曰治女子少腹腫滿利小腸下水

氣除浮腫 蘇頌曰治面黥黑子

根白皮修治

李時珍曰李根皮取東行者刮去皺皮炙黃入藥用別錄不言用何等李根亦不言其味但藥性論云入藥用苦李根皮味鹹而張仲景治奔豚氣奔豚湯中用甘李根白皮則甘苦二種皆可用與

根白皮氣味

大寒無毒 大明曰涼無毒

根白皮主治

別錄曰消渴止心煩逆奔豚氣 吳普曰治瘡 陶弘景曰煎水含漱治齒痛 大明曰煎

汁飲主赤白痢 孟詵曰炙黃煎湯日再飲之治女人卒赤白下有驗 李時珍曰治小兒暴

熱解丹毒 甄權曰苦李根皮味鹹治腳下氣主熱毒煩燥煮汁服止消渴

花氣味

苦香無毒

花主治

李時珍曰令人面澤去粉滓黥黯

葉氣味

甘酸平無毒

葉主治

大明曰小兒壯熱疳疾驚癇煎湯浴之良

樹膠氣味

苦寒無毒

樹膠主治

李時珍曰目翳定痛消腫

附方

女人面黥用李核仁去皮細研以雞子白和如稀餡塗之至旦以漿水洗去後塗胡粉不過五六日

効忌見風

崔元亮海上方

蠹螬螫苦杏仁嚼塗之良

古今錄驗

小兒丹毒從兩股走及身頭用李根

燒爲末以田中流水和塗之

千金方

咽喉卒塞無藥處以皂角末吹入取嚏仍以李樹近根皮磨

水塗喉外卽驗

救急雜記

面黑粉滓用李花梨花櫻桃花白葵花白蓮花紅蓮花旋覆花秦椒各六

兩桃花木瓜花丁香沈香青木香鍾乳粉各三兩珍珠玉屑各二兩蜀水花一兩大豆末七合爲細

末瓶收每日盥醕用洗手面百日光潔如玉也

普濟方

徐李

別錄曰生太山之陰樹如李而小其實青色無核熟則采食之輕身益氣延年

李時珍曰此卽

無核李也唐崔奉國家有之乃異種也謬言龍耳血墮地所生

鼠李釋名

李時珍曰鼠李方音亦作楮李未詳名義可以染綠故俗稱皂李及烏巢烏槎趙皆皂子之音訛也

一種苦楸亦名鼠梓與此不同見梓下

集解

別錄曰鼠李生田野采無時

蘇頌曰卽烏巢子也今蜀川多有之枝葉如李其實若五味子色

黯黑其汁紫色熟時采日乾用皮采無時

寇宗奭曰卽牛李也木高七八尺葉如李但狹而不

澤子於條上四邊生生時青熟則紫黑色至秋葉落子尙在枝是處皆有今關陝及湖南江南北甚多
李時珍曰生道路邊其實附枝如穗人采其嫩者取汁刷染綠色

子氣味

苦涼無毒

子主治

本經曰寒熱瘰癧瘡

大明曰水腫腹脹滿

蘇恭曰下血及碎肉除疔瘻積冷九蒸酒漬服

三合日再服又搗傅牛馬六畜瘡中生蟲

李時珍曰瘡瘡黑陷及疥癬有蟲

子發明

李時珍曰牛李治痘瘡黑陷及出不快或觸穢氣黑陷古昔無知之者惟錢乙小兒直訣必勝膏用之云牛李子卽鼠李子九月後采黑熟者入砂盆搗爛生絹揅汁用銀石器熬成膏瓷瓶收貯常令

透風每服一皂子大煎桃膠湯化下如人行二十里再進一服其瘡自然紅活入麝香少許尤妙如無生者以乾者爲末水熬成膏又九籟衛生方亦云痘瘡黑陷者用牛李子一兩炒研桃膠半兩每服一錢水七分煎四分溫服

皮氣味

苦微寒無毒

蘇恭曰皮子俱有小毒忌鐵

皮主治

別錄曰身皮熱毒

大明曰風痺

蘇恭曰諸瘡寒熱

孟詵曰口疳齩齒及疳蟲蝕人脊

骨者煮濃汁灌之神良

子發明

蘇頌曰劉禹錫傳信方治大人口中疳瘡發背萬不失一用山李子根一名牛李子薔薇根野外者各細切五升水五大斗煎半日汁濃卽于銀銅器中盛之重湯煮至一二升待稠瓷瓶收貯每少含嚥必瘥忌醬醋油膩熱麪及肉如發背以帛塗貼之神效襄州軍事柳岸妻竇氏患口疳十五年

齒盡落斷不可近用此而愈

附方

諸瘡寒熱毒瘰及六畜蟲瘡鼠李生搗傅之

聖惠方

齒齲腫痛牛李煮粥空腹飲一盞仍頻含漱

聖濟錄

閩書 南產

臙脂李出福州蒸曬最嘉李子之味酸甘

王象晉羣芳譜 李花

李樹大者高丈許樹之枝幹如桃葉綠而多花小而繁色白

李實

李實有離核合核無核之異小時青熟則各色有紅有紫有黃有綠又有外青內白外青內紅者大者如杯如卵小者如彈如櫻其味有甘酸苦澀之殊性耐久樹可得三十年雖枝枯子亦不細種類頗多有麥李南居李季春李木李御黃李均亭李璧李糕李中植李趙李御李赤李冬李離核李皆

李之特出者他如經李杏李黃扁李夏李名李縹青李建黃李青皮李赤陵李馬肝李牛心李紫粉李小青李水李扁縫李金李鼠精李合枝李柰李晚李之類未可悉數建寧者甚甘今之李乾皆從此出 移栽春月取近根小條栽之離大樹遠者不用待長移之別地性喜開爽宜稀栽南北成行率兩步一株太密聯陰則子小而味不佳樹下勤去草而不可耕耕則樹肥而無實

直省志書 宛平縣

物產玉黃李青脆牛心鴈過紅麝香紅串鵲紅

昌平州

物產李有青黃紅紫四色又有牛心麝香竄雀紅胡廝賴等名並甘脆

遵化縣

物產李有朱李黃李紫李青李凡數種味皆甘芳

歷城縣

方產李數種青白色者甘脆